

11/03/1999

Litar F-1 seiring wawasan

KUALA LUMPUR, Rabu - Parti Gerakan menyifatkan pembukaan Litar Lumba Formula 1 Sepang (Litar Sepang F-1) sebagai suatu langkah ke arah merealisasikan Wawasan 2020.

Timbalan Setiausaha Agung parti itu, Dr Tan Kee Kwong, berkata pihaknya mengucapkan tahniah kepada semua pihak yang terbabit dalam pembinaan litar itu dengan harapan terus melaungkan semangat 'Malaysia Boleh'.

"Gerakan menyokong kenyataan Perdana Menteri, Datuk Seri Dr Mahathir Mohamad yang menganggap pembinaan kemudahan sukan bertaraf dunia akan membawa manfaat kepada negara dalam banyak aspek," katanya dalam kenyataan di sini, hari ini.

Keupayaan Litar Sepang F-1 sebelum ini mendapat pengiktirafan antarabangsa termasuk jaguh dunia, Mika Hakkinen dan juara Grand Prix Australia, Eddie Irvine.

Litar Sepang F-1 akan menjadi tuan rumah kejohanan Formula 1 pada 17 Oktober depan, pertama kali diadakan di Malaysia.

Dr Mahathir ketika merasmikan litar itu malam tadi berkata, pihak yang selama ini mempersoalkan projek itu perlu akur Malaysia meraih banyak faedah, peluang dan kemudahan menerusi program berkenaan.

Menurutnya, Litar Sepang F-1 turut menyokong industri automobil negara, khususnya dalam bidang penyelidikan dan pembangunan (R&D).

Dr Tan berkata, semua pihak yang menguruskan litar itu perlu berusaha memastikan kemudahan itu mendapat perhatian semua pihak terutama dari aspek promosi, pasaran, kerja sokongan, pengurusan organisasi dan nilai tambah lain.

"Struktur fizikal yang ada pada litar itu saja tidak mencukupi sebaliknya ia perlu didukung oleh pengurusan yang baik dan mantap," katanya.

Beliau berkata, Litar Sepang F-1 perlu bersaing dengan litar terkemuka dunia seperti Imola, Itali; Monte Carlo, Monaco; Silverstone, England dan Hockenheim, Jerman.

"Sehubungan itu, Litar Sepang F-1 perlu bersaing dengan litar lain dan belajar mengisi kekurangan yang ada," katanya.

Dr Tan berkata, penganjuran Kejohanan Formula 1 Oktober depan akan meningkatkan lagi pencapaian negara dalam bidang sukan serta menyemarakkan ekonomi negara.

(END)